

Yëkkuö skà kit Pablo tö Corinto wakpa a, i' ta ide böt

2 Corintios

Mik Pablo bak kanëblök Macedonia etä ie' tö yëkkuö skà kit Jesús mik erblökwakpa serke Corinto ena ipamik e'pa a. Wëm kiè Tito e' kanëblöke Pablo ta Jesús tté pakök. Ie' tso' Corinto, mik ie' dene Pablo ska' etä ie' tö Jesús mik erblökwakpa tso' Corinto e'pa kabërke ñita e' paké Pablo a. E' kueki Pablo tö yëkkuö i' kit. Ì tköke Corinto wakpa ta e' dör i': Welepa e' chò tö ie'pa dör Jesús ttekölpa erë kè idör moki. Esepa dë'mi Corinto ta Jesús mik erblökwakpa tö iki'warak buaë. Ie'pa ñekkëpa tö s'wöbla'weke kache tté wa. Ie'pa e' ù tö ie'pa dör buaë Pablo tsata. Ie'pa tö icheke tö Pablo dör siarë kè dör kékëpa taië. Es ie'pa tso' Jesús mik erblökwakpa kitö'uk. Pablo éna Jesús mik erblökwakpa dalër taië e' kè kiane ie' ki tö imi'yal ñala sulusi ki kachökwakpa itöki. E' kueki ie' tö yëkkuö i' kit ie'pa a as ie'pa tso' ttsë'ka kachökwakpa yöki ena er bua' wa ì kkayëne ie'pa a e' dalöiök. Nies ie' tö ie'pa a iché tö ie' dör Jesús tteköl moki.

E' kfié ta kam ie' tö yëkkuö i' shtë etä ie' tö inuköl ki' ie'pa a Jesús mik erblökwakpa siarëpa tso' Jerusalén e'pa kimoie. S'kitö'ukwakpa tö iyë' tö Pablo tö inuköl e' tšeketkö iwák a, erë ie' tö iché tö e' kè dör es. Ie' mi'ke betka Jerusalén pakök e' kueki Jesús mik erblökwakpa tso' Corinto e'pa kawötä inuköl ki shtëk tsëmi Jerusalén.

Shkë'wè

1 ¹Ye' dör Pablo. Skëköl wák er wa ye' dör Cristo Jesús ttekölpa tsá e'pa eköl. S'yami kiè Timoteo, e' tso' ye' ta íe. Sa' tso' yëkkuö i' shtëk a' dör Skëköl icha erule serke Corinto, e'pa a. Nies sa' tso' yëkkuö i' shtëk s'batse'r malepa serke ká malepa ate Acaya, e'pa ulitane a.
²Skëköl dör S'yé ena Skëképa Jesucristo as e'pa er buaë chò ena sene bèrè mù a' a.

Pablo weirke e' shuà Skèköl kíkékaitö

³Skèköl dör Skèképa Jesucristo yé, e' kíkòkàsò taië. Ie' dör S'yé e' tò se' sueke er siarè wa ena se' er pableke kèkraë. ⁴Sa' weirke kòs Cristo tté kueki, e' shuà sa' er pableke Skèköl tò as s'malepa weirke esepa er pablò sa' tò wes ie' tò sa' er pableke es. ⁵Cristo weine taië, e' ukuö miria sa' ki taië. Erè ñies ie' batamik sa' er pablërke taië shutë. ⁶Sa' weine es, età e' dör a' er pabloie, a' tsatkoie. Ñies Skèköl tò sa' er pablé, età ñies e' dör a' er pabloie as a' weirke wes sa' es ese dalë'ttsò a' tò er bua' wa. ⁷Sa' wà ijcher tò a' weirke wes sa' es, erè ñies a' er pablërke wes sa' er pablërke es. E' kueki sa' wà ijcher buaë tò a' kè tò sa' eriawëpa.

⁸A yamipa, sa' ki ikiane tò a' wà ijcher tò sa' weine Asia e' dör darèrè sa' a. Sa' diché kè dè'kà iwöklö'woie. Sa' ibikeits tò kè sa' döpattsa ttsè'ka. ⁹Sa' e' ttsé' wes s'wömenettsa ttèwà es. Erè e' wamblène sa' tã as kè sa' erblò sa' wákpa mik, e' skéie as sa' erblò Skèköl tò s'shke'wèkane e' wák mik. ¹⁰⁻¹¹Sa' ttekelur ñe' e' ulà a' ie' tò sa' tsatké'ttsa ena sa' tsatkeraëitö. Ie' dapömik sa' moneka darèrè. A' sa' kímé S'yé a' ikiök sa' ki, e'ma ie' tò sa' tsatkè michoë. A' taië tò iwé es, e' tã ie' tò sa' kímèraë e' ki wèstela cheraë ie' a' se' taië tò.

Ì kueki Pablo kè dè' Corinto

¹²Sa' er kè tò sa' kkatè ì ki, e' tò sa' ttsé'weke buaë. Kèkraë Skèköl tò sa' a imè sèno yèsyèsé e' batseitsök buaë er mokì wa sulitane wö wa ena bua'ie a' wö wa. Sa' ser es, e' kè dör siwà' iski tso' ká i' a' ese wa, e' dör Skèköl er buaë chò se' a' e' wa. ^{13,14}Yèkkuö kòs kitmi sa' tò a' a, e' wà kè dör tté blèulewà ese, iaritsmi a' a ena iwà armi a' éna. Eré wes sa' dör e' kè ane a' éna bua'ie, erè ye' ipaneke tò wèkkè alè tã a' éna iarðä sèraa. E' dör es, e' tã mik Skèképa Jesús datskene, età e' kèwö ska' a' e' ttsöraka buaë sa' wa wes sa' e' ttsöraka buaë a' wa es.

¹⁵Ye' ibikeitsé tò a' e' ttséka ye' wa buaë, e' kueki warma ye' ibikeitsé tò ye' mi' a' pakök bötökicha as a' ttsé'r buaë bötökicha. ¹⁶Ye' ibikeitsé tò mik ye' mi'ke Macedonia, età warma ye' tkökemi a' pakök. Ye' datskene, e' tã ye' damitköne a' pakök. Es a' a ye' kímèrmi shkoie Judea. ¹⁷Erè kè ye' wà ionè es. Ye' dè' a' pakök etökicha è, e' kueki ¿a' ibikeitsé tò ye' kè wà iwà bikeitse buaë kewe? ¿A' ibikeitsé tò ye' ttò bötöt wes s'ditsö èse es? ¹⁸Erè Skèköl ttò mokìë, e' ttò wa ye' ichè a' a tò ye' kè ttò a' tã bötöt. ¹⁹E' wà dör tò Jesucristo dör Skèköl Alà, e' kè ttò bötöt, ie' ttò etkème. Ie' tté buaë paka' ye' ena Silvano ena Timoteo, e'pa tò a' a. ²⁰Ì kòs uk Skèköl kablé, e' wéitö Cristo wa. E' kueki mik se' ñi dapa'uke Skèköl kíkòkka, età se' tò icheke: "Es e' idir" Cristo Jesús ttò wa. ²¹Yi tò a' ena sa' kk'oneke as se' turlurie Cristo mik, e' dör Skèköl. Ie' tò se' shukitbak iwák a. ²²Ie' tò se' er wakyué ie' wák a. Ñies iwíköl méitö se' a wes íyi tsá patuésö es ikkachoie tò se' tsatkeraëitö da'a.

²³Ie' wā ye' sūle buaē e' wōwa ye' ichè a' a' tō kām ye' dōne Corinto warma wēs ye' ibikeitsé es, e' wà dōr tō kè ye' éna a' kī eriawāk. ²⁴Sa' wa ijcher tō a' erblōke buaē Jesús mik, e' wa a' tkēnewā darērē. E' kuēkī sa' tso' a' kīmuk er bua' wa as a' ttsè'r buaē. Kè sa' ku' a' patkōk kēsik wa a' erblōke e' iutōk.

2 ¹E' kuēkī ye' ibikeits tō ye' kè shkakne a' pakōk a' eriawoie. ²A' è tō ye' ttsè'wèmi buaē. Erè a' eriawéyō, e' tã çyi tō ye' ttsè'wèmi buaē? ³Warma a' ye' ttsè'wè buaē, e' kuēkī yēkkuō iēt kitmiyō a' a' e' kī a' pautyō darērē as a' e' shulò, etã es a' kè tō ye' eriawēpa. Ye' iklōō' yēsýsè tō a' ulitane ttsè'rdaē buaē ye' tã ñita. ⁴Mik ye' tō yēkkuō ñe' kit, etã ye' eriane siarē, ye' chkenewā taijè dō ye' iéttsaie ekkè. Erè kè ye' wā ikitè a' eriawoie. E' skéie ye' ikitmi as a' éna iar tō a' dalër taijè ye' éna.

Yi tō ì sulu wamblè' e' nuí olo'yé Pablo tō

⁵Wēm tō kabene tski'ka a' shuā ì sulu wambléitō e' wa, e' kè wā ye' è eriaone. Isalema ye' tso' ikī kuōtkōkka, erè ye' ichè tō wēs alè ie' tō a' ulitane eriawé. ⁶Kos a' kibiiepa tō ie' kī inuí métke e' dōr wè. ⁷I'ñe tã a' tō inuí olo'yó ikī tã ikimú as kè ieriar taijè kè er pablēneia ekkè. ⁸E' kuēkī ye' kkōchò a' a' taijè tō ikkachónè ie' a' tō mokī a' éna ie' dalër. ⁹Yēkkuō ñe' kitmiyō a' a' isuōie tō ye' ttò iuté a' tō sēraa ö au. ¹⁰Yi isie nuí olo'yé a' tō ikī, ñies ese kī ye' tō ilo'yeke. Mokī yō ichè Cristo wōwa ena a' dalèrmik tō ilè nuí tso' kiane olo'yè, e' tã e' olo'yétkeyō ¹¹as Satanás kè e' alòka se' kī. Wēs ie' éna se' sulu'wakwā, e' ane se' éna buaē.

Tito kè dè' Tróade

¹²Mik ye' de ká kiè Tróade Cristo tté buaē pakōk ee, etã ye' isué tō Skékēpa tō ye' a' ñalā yuétke buaē itté pakoie. ¹³Erè s'yami Tito wā a' biyó done ye' a, e' kè kune ye' wā wēs ikablè' es. E' tō ye' tkiwé kabikeitséka taijè. E' kuēkī ye' e' chéat Tróade wakpa a' tã ye' mía Macedonia ie' yulök.

Íyi ulitane kī se' e' alókami Cristo wa

¹⁴Erè wéstela Skéköl a' Kēkraē ie' tō sa' wēttsēke e' aloka íyi ulitane kī Cristo tã ñita. Sa' wa ie' tō Cristo tté buaē pakeke ká wañe, e' dōr wēs kiò masmas alabur es. ¹⁵Sa' tō Cristo tté pakeke, e' dōr wēs íyi alar masmas ña'wè Cristo tō Skéköl a' ikikōka es. Sa' dōr wēs kiò masmas alar es. Erè wépa tsatkērke ena wépa kè tsatkērku' esepa bōltēpa wōā ilār kuā'kī kuā'kī. ¹⁶Wépa kè tsatkērku' esepa a' tté pakeke sa' tō e' dōr wēs s'nu alar es, e' wa ie'pa duōralur e' kuēkī. Erè wépa tsatkērke esepa a' e' dōr wēs íyi alar buaē es, e' wa sene michoē dōraē ie'pa ulā a' e' kuēkī. çYi dirmi ttè i' wakanéuk? ¹⁷Taijè pè' tō Skéköl tté pakeke inuköl è klō'woie, erè sa' kè dōr es. Ie' tō sa' patké ipakōk, e' kuēkī sa' tō ipakeke er mokī wa ie' wōwa Cristo dalèrmik.

Skëköl ttè pa'ali e' wakanéukwakpa sa' dör

3 ¹¿Ima a' ibikeitsè tò sa' wákpa e' tté chöke a' a? ¿Ima a' ibikeitsè tò sa' k_i yëkkuö kiane sa' tté choie a' a ö a' tò yëkkuö mèmi sa' a sa' tté choie wës wele tò iweke es? Yëkkuö ese kè kiane sa' k_i. ²A' wakpa dör wës sa' tté choie yëkkuö es. E' kitule sa' er a suule ena aritsule sulitane wä. ³Iwënewä wöshak tò a' dör wës yëkkuö kitmi Cristo tò patkëne sa' ulä a es. Yëkkuö e' kè kitule tinta wa, e' skéie ikitule Skëköl ichökle e' Wiköl wa. E' kè kitule ákkue k_i wës tté dalöiëno kite ákkue k_i es. E' skéie ikitule a' er a. ⁴Sa' erblöke Skëköl mik Cristo batamik, e' è kuek_i sa' tò a' ché es. ⁵Sa' kè a iyënu_k tò kanè wé sa' tò a' shuä, e' dör sa' wákpa diché wa. Skëköl tò sa' a ieri mé iwakanéwoie. ⁶Ie' tò sa' a ieri mé ie' tté pa'ali mène se' a e' wakanéuk. Ttè e' kè datse tté dalöiëno mène ká iaiaë e' wa. E' skéie idatse Skëköl Wiköl wa. Ttè dalöiëno ñe' tò s'kichateta'ttsä erë Skëköl Wiköl tò sene michoë meke se' a.

⁷Ttè dalöiëno këchke kitule ákkue k_i, e' mène ká iaiaë Israel aleripa a. Mik tté e' tsá mène, eta Skëköl olo bune taië. E' klöne Moisés wö k_i dalölöë dò imalepa kè wö dë'wä ie' wö sauk ekkë. Erë dalò e' chowamine enaena. Ttè ñe' mène olo ta' taië ikkachoie tò e' dör tté dalò ta' taië ese. ⁸Ie' yita Skëköl Wiköl kanè e' olo tkòka taië tté ñe' tsata! ⁹E' wä dör tò tté tò s'kichateta'ttsä ñe' mène dalò ta' taië, ie' yita tté wa Skëköl tò s'klò'wemi wës pé! buaë yësyësè es e' pakè olo ta' taië shute tkòka tté tsá mène e' tsata! ¹⁰Mok_i tté pa'ali e' olo ta' taië shute, e' o'mik tté iët olo kè dör ì. ¹¹Ttè kè dör yöbië e' de olo ta' taië, ie' yita tté dör yöbië e' olo ta' taië shute!

¹²Ttè e' wä paneke sa' tò kröröë, e' kuek_i sa' tò iwä pakeke sulitane kukua kè suarta! ¹³Sa' kè tò iweku' wës Moisés tò io' es. E' wö pabakëwä datsi'tak wa as Israel aleripa kè tò isaù tò ie' wö dalò bune e' chowamine seraä. ¹⁴Erë ie'pa er darë'newä, kè éna iwä ane. Ie'pa er pabakulewä wës Moisés wö pabakwä es. Es ñies i'ñe ta' ie'pa aleripa er pabakulewä mik ie'pa tso' tté këchke mène iyëpa bak e'pa a e' aritsök eta. Ie'pa er pabakulewä e' sirmittsä erblè Cristo mik, e' è wa. E' kuek_i ie'pa icha kam sirttsä. ¹⁵Dò ikkë ta, mik ie'pa tò yëkkuö kit Moisés tò e' aritseke, eta ie'pa er tso'ia pabakulewä. ¹⁶Erë mik se' er manel'wé Skëképa a, eta se' er pabakulewä, e' sinettsä. ¹⁷Skëképa e' dör Skëköl Wiköl. Wé e' tso', eta ee se' yënetsä tté dalöiëno ulä a. ¹⁸Es se' dör wës s'wö kè pabakulewä es, esepa qos k_i Cristo olo wërke buaë wës wösuö es. Se' maner michoë as se' dò wës Skëképa olo ta' taië es. E' qos wakanewëke Skëköl Wiköl tò.

Sa' dör Jesucristo ttekölpa tsá

4 ¹Skëköl tò sa' sué er siarë wa, e' batamik kanè i' méitö sa' a. E' kuek_i kè sa' e' chkeuwä. ²E' skéie kè sa' tò iwakanewëku' blëule wës

ì dör jaë ese es. Sa' kè kṽ s'kṽtö'uk. Sa' kè kṽ Skëköl ttè shṽtuökḁ kache tté wa. E' skéie tté mokṽ pakeke sa' tō yësyësë Skëköl wōā ās sulitane wā ijcher tō ì ché sa' tō, etā es idir. ³Erë Jesús tté buaë pakeke sa' tō, e' pabakulewā, e' tā ipabakulewā wēpa kichatërke esepa è yökṽ. ⁴Ie'pa kè erblötā' Cristo mik. Bé dör ká i' këköl, e' tō ie'pa er pabakéwā da'aie ās kè ie'pa éna Cristo dör Skëköl wák suë olo tā' taië e' tté buaë wā ar. ⁵Sa' kè tō sa' wákpa tté pakekṽ. Sa' tō Jesucristo dör Skëképa, e' tté pakeke. Sa' e' chò tō sa' dör wes a' kanè mésopa es a' kimoie Jesús dalërmik. ⁶Mik Skëköl tō ká i' yö', etā ie' iyë': “ká ñinú,” etā ká ñine. Ie' wák tō se' er ñi'wé ās ie' olo taië burke Jesucristo wō kṽ, e' ar se' éna. E' kuekṽ sa' tō ie' tté buaë e' pakeke sulitane a.

Se' weirke ká i' kṽ, e' dör bërbër è

⁷Jesús tté buaë, e' dör wes íyi bua'buā ské darërë es, e' meneat sa' a wakanewë. Erë sa' kè diché tā'. Sa' dör tottola wes skāu es. E' dör iwā kkachöie tō diché wa sa' tō iwakanewëke e' meke Skëköl tō sa' a, e' kè dör sa' diché. ⁸Eré kabene tso' sa' kṽ taië këkraë, erë e' kè e' alineḁ sa' kṽ. Eré sa' kè wā ijcher wes sa' e' ùmi, erë kè sa' e' òwa e' yökṽ. ⁹Eré sa' bolökpa tō sa' tötieke, erë Skëköl kè wā sa' meneat. Eré sa' dettsā isḁ, erë sa' e' kökekāne. ^{10,11}Se' tso'ia' tssë'ka ká i' a, e' dalewa sa' chöke sa' bolökpa ulā a sa' ttekelur Jesús tté kuekṽ wes ie' kötwarakitö es. Sa' weirke es ās iwërwa sa' kṽ tō mokṽ ie' shkënekāne, e' tso' sa' tā. ¹²Duewā dalò me'rie sa' kṽ, es sa' weirke a' dalërmik ās sene michoë dō a' ulā a. ¹³Itso' kitule Skëköl yëkkuö kṽ wé yile tō iyë': “Ye' erblé imik e' kuekṽ ye' iché.”^a Es ñies sa' erblöke Skëköl mik wes yi ñe' es, e' kuekṽ sa' tō ie' tté pakeke. ¹⁴Sa' wā ijcher tō ie' tō Skëképa Jesús shkë'kāne ñies ie' tō sa' shkë'wërakāne wes Jesús shkë'kāneitö es, sa' batsulewā Jesús mik e' kuekṽ. Aishkuö tā ie' wā sa' miraë a' tā ñitā wé ie' tso' eë. ¹⁵Sa' weirke kōs e' dör a' kimoie ās se' taië tō wëstela chò Skëköl a' ier buaë ché se' taië a' e' kuekṽ. E' wa ie' kṽkardakā taië. ¹⁶E' kuekṽ sa' kè e' chkeuwa. Eré sa' chká mir wa'k è, erë sa' er diché kṽ iërke kṽtā kṽtā ká bit ekkë. ¹⁷⁻¹⁸Ì kōs suëkesö s'wöbla wa ese ertā'wa. Erë ì kōs kè wërta' ese dör yöbië. E' kuekṽ kè sa' er menewā ì suëkesö ese kṽ. E' skéie sa' er me'rie ì kè wërta' ese kṽ. E' kuekṽ sa' weirke siarë, e' kè dör taië sa' a, e' dör ekuölö è. E' wā dör tō e' wa ì dör buaë, olo tā' taië yöbië, e' dōraë sa' ulā a taië shṽte tkòkā kōs sa' weine e' tsatā.

5 ¹S'chkà dör wes úla es, e' dör buaë sēnoie ká i' kṽ è. Se' wā ijcher tō mik se' úla i' panane, etā u yöbië tso'tke Skëköl wā se' a ká jaì a. E' dör se' chká pa'alṽ ser michoë yöule ie' wā e'. ²E' kuekṽ mokṽ ká i' kṽ se' rrerke. S'chkà pa'alṽ merke se' a aishkuö tā ká jaì a, e' kkecheke

^a 4.13 Salmo 116.10

se' tō poë. Se' éna s'chka i' mane'waktke s'chka pa'alí wa wes datsi' mane'wèsö es. ³E' kiane se' k_i as se' wiköl kè at aishkuö tã kè chka tã wa wes se' sume es. ⁴Se' tso'ia se' úla i' a etã se' kköchöke se' serke chkeulewã wes dalí ekkeë e' dikia es. Kè dör tō se' duakulurtke senoie chka kè tã'. E' skéie se' éna s'chka i' mane'waktke chka pa'alí ñe' wa as ì duötã'wã ese manerttsane ì ser michoë ese wa. ⁵Skököl wák tō se' kanewétke maneñuk ñe' es. Ie' tō iWiköl mé se' a wes íyí tsá patuësö es iwã kkachoie tō iwã döraë se' ulã a wake'.

⁶E' kuek_i kè se' tkirku' ì k_i, eré se' wã ijcher tō se' tso' kãmí Skökëpa yök_i, se' tso'ia ttsé'ka ká i' a e' dalewa. ⁷I'ñe tã ie' kè sunuk se' a, eré se' serke se' erblé ie' mik e' wa. ⁸Kè se' tkirku' ì k_i. Se' a tã s'chka i' mú mèatsö, e' tã es se' mía senuk ie' ska', e' dör ibua'ie. ⁹⁻¹⁰Se' ulitane kawöta dökwa Cristo tkër s'shulo kulé k_i e' wörk_i. Eë ì kos wé se' tō ká i' k_i, buaë ena suluë, ese kkayërdaë tã e' ské meraëitö se' a eköl eköl. E' kuek_i se' tso'ia ttsé'ka ö se' mía ie' tã, eré kekraë se' e' chöke senuk yësyësë as ie' wa iwër buaë.

Skököl er buarne se' k_i e' pakè

¹¹Sa' tō Skökëpa dalöieke tajë, e' kuek_i sa' e' chöke darërë s'malepa pablök as ñies ie'pa tō ie' dalöiö. Skököl wã ijcher buaë tō sa' er yësyësë, e' mú jcher a' wã ñies. ¹²Sa' kè skã ku'ne e' tté chök a' a. E' skéie sa' tso' a' a kawö skã mukne e' ttsökã sa' wa. E' wa a' tō sa' tsatkëmi wépa tō sa' cheke suluë, esepa yök_i. Ie'pa esepa e' ttsökã tajë is imalepa wa iwër ese wa, kè dör is ie'pa er dör Skököl wöã ese wa. ¹³Sa' wër alíie, e' tã e' dör Skököl dalërmik. Kè sa' wër es, e' tã e' dör a' kimoie. ¹⁴Sa' éna iane tō Cristo éna se' dalër tajë, e' tō sa' ké senuk ie' a. Sa' éna iane tō ie' eköl è kötewã sulitane skéie, e' wã kiane chë tō e' dör wes sulitane kötewã es. ¹⁵Ie' kötewã sulitane skéie as se' tso'ia ttsé'ka esepa kè seriã wes se' k_i ikiane es, e' skéie as se' ser wes ie' kötewã shkenekane se' skéie e' k_i ikiane es.

¹⁶E' kuek_i kè sa' ku'ia s'malepa bikeitsök wes ká i' wakpa tō ibikeitseke es. Kenet sa' tō Cristo bikeits es. Sa' ibikeits tō ie' dör se' ése è. Eré i'ñe tã sa' kè tō ie' bikeitsekü'ia es. ¹⁷E' kuek_i yi batsulewã Cristo mik, esepa er maneñettsã yöne pa'alí. Wes ie'pa bak senuk e' kè ku'ia, e' skéie isenémine pa'alí. ¹⁸E' kos wé Skököl tō. Ie' er buanene se' k_i Cristo batamik. Ñies tté buaë pakè e' kané me'itö sa' a. ¹⁹Tté buaë ñe' dör i' es: Skököl er buarmine ká ulitane wakpa k_i Cristo batamik kè ie'pa wöchakek_i inu_i k_i. Ñies ie' tō tté buaë e' me' sa' a wã pakè sulitane a. ²⁰Sa' dör Cristo ttekölpa. E' dör wes Skököl wák kköchöke a' a sa' wa es. E' kuek_i sa' kköchöke a' a Cristo ttö wa tō a' er bua'üne Skököl a. ²¹Cristo kè wã ì sulu wamblëne yës, eré Skököl tō ie' su' wes ì sulu wamblökwak es se' skéie. Ie' tō iwé es as se' batsulewã Cristo mik e'pa saüitö wes iwák dör yësyësë es.

6 ¹ Sa' kaneblöke Skëköl tã ñita, e' kuëki sa' kköchöke a' a' tã ie' er buaë ché a' a, e' kè tsar é. ² E' wà dör tã ie' tã ichè iyëkuu kï i' es:

“Mik ye' er buaë chò be' a e' kèwö de,
 etã be' kköchöke e' ttséyö.
 Mik be' tsatkè e' kèwö de,
 etã be' kiméyö.”^b

Ye' ttò ttsó: Skëköl er buaë chò a' a, e' kèwö detke. Ie' tã a' tsatkè e' kèwö de i'ñe.

³ Sa' e' kkö'nuke buaë kekraë sulitane wörki as kè yi tã Skëképa Jesús watótsã sa' ukuömik. E' kè dör es, e' tã sa' kaneblöke Skëköl a' e' yëmi suluë. ⁴⁻⁵ E' skéie ì ulitane wa sa' tã ikkacheke tã mokï sa' dör Skëköl kanè mésopa. Mikle tã sa' weirke, mikle tã sa' kè wã ì tã, mikle tã kawö darèrè tköke sa' tã. Mikle tã sa' burke siarè, sa' wötërke, pè' iërkeka taië sa' kï. Sa' kaneblöke darèrèè taië shute, wöñirke taië, tteke bli tã. Erè e' kos dalè'ttseke sa' tã bèrè. ⁶ Ñies sa' tã ikkacheke sa' ser batse'r ena ì jcher se' wã e' wa. Ì kos paneke sa' tã bèrè er bua' wa. Sa' er buaë chöke s'malepa a. E' kos wa sa' tã ikkacheke tã mokï sa' dör Skëköl kanè mésopa. Iwënewa tã Wiköl Batse'r tso' sa' tã. S'malepa dalëritseke sa' tã er mokï wa. ⁷ Ttè mokï pakeke sa' tã. Ì kos weke sa' tã diché meke Skëköl tã sa' a' e' wa. Sa' serke yësyësè, e' dör sa' a' wës tabè tso' ñippökwapka wã ñippoie ena e' tsatkoie es. ⁸ Mikle tã sa' dalöierke, mikle tã kè sa' dalöierku'. Mikle tã sa' kïkekeka buaë, mikle tã sa' cheke suluë. Sa' ttò mokï, erè mikle tã sa' sueke kachökwakpaie. ⁹ Ie'pa wã sa' suule buaë, erè ie'pa tã sa' sueke wës ie'pa kè wã sa' suule es. Wësua sa' duökelurtke, erè sa' tso'ia' ttsè'ka. Ie'pa tã sa' we'ikè siarè, erè kè itö sa' ttélur. ¹⁰ Sa' eriarke taië, erè sa' ttsè'rke buaë kekraë. Wësua sa' dör siarëpa, inuköl kè tã', erè Skëköl ttè wa sa' tã s'blu'weke taië. Wësua sa' kè wã ì tã', ñermata ì ulitane tso' sa' wã.

¹¹ A Corinto wakpa, sa' ttöke a' tã yësyësè. A' dalèr taië sa' éna. ¹² E' kè blène sa' wã a' yöki, erè a' je' tã iblé sa' yöki. ¹³ E' kuëki ye' kköchöke a' a' wës alà a' iyé kköchò es, sa' bikeitsó er bua' wa wës sa' tã a' bikeitseke es.

A' e' batsótsã ì sulu kos e' yöki

¹⁴ Kè a' e' batsök wépa kè erblöta' Jesús mik esepa tã. ¿Wës sene yësyësè batsmi sene sulu tã? ¿Wës kã ttsetse ena kã ñi a' e' shuirirmika ñita? ¹⁵ ¿Wës Cristo ena bé sermi bèrè ñita? Yi erblöta' Jesús mik ena yi kè erblöta' imik ¿wës esepa batsmi ñi mik? ¹⁶ Se' dör wës Skëköl ichók e' wé mokï es. E' kuëki ¿wës e' ñi sini'kumi íyi diököl tso' dalöiè ese tã? E' ye' Skëköl tã i' es:

^b 6.2 Isaiás 49.8

“Ye' serdaë ie'pa shuà,
Ye' shkōraë ie'pa tã ñita;
Ye' dōraë ie'pa Këkōl
ena ie'pa dōraë Ye' icha.”^c

17E' kueki ñies Skëkōl tō iyë':

“A' e' yóttsa, a' e' skótsa bānet pë' kè tō ye' dalōië esepa yōki.
Ì kōs dōr ñá ese kè kar
e' tã Ye' tō a' kierawã buaë.

18A' serke es, e' tã Ye' dōraë a' yéie

ena Ye' tō a' klō'weraë Ye' ala'rie.
Ye' dōr Skëkōl diché tã' taië íyi ulitane tsata,
e' wák tō ichè es.”^d

7 1A yamipa dalër taië ye' éna, es se' a Skëkōl kablë' e' kueki se' e' paiklò sene sulusi kōs tō se' er ena se' chkà ia'wëmi, e' yōki. Se' e' chò senuk batse'r këkraë, ie' dalōië taië e' wa.

Pablo ttsë'wë buaë Corinto wakpa tō

2iSa' bikeitsó er bua' wa! Kè sa' wã ì sulu wamblëne yi tã. Kè sa' wã yi weine yës. Kè sa' wã yi kitëne kache tté wa. 3A' dalër taië sa' éna, e' kueki kè ye' ku' ttè i' chök a' kkatoie. Ye' tō a' a iyë'baktke kuaë tō sa' tō a' bikeitsè michoë dò sa' duolur ekkë. 4Ye' erblōke buaë a' mik. A' wa ye' e' tstsëka taië. Sa' weirke kōs e' shuã ye' er künene buaë. Ye' ttsé'ne buaë shute.

5Sa' de Macedonia tã kè sa' wã kawō kune enoie. E' skéie kabene kí de taië sa' kí. Taië sa' tsiriwé sa' bolökpa tō. Ñies sa' suane taië. 6Erë Skëkōl tō s'er pableke, e' tō sa' er pablé s'yami Tito de sa' ska' e' wa. 7Kè dōr tō ie' de e' è kueki. Ñies wës a' tō ie' er kuwé e' biyó tō sa' er pablé taië. Ie' tō sa' a iché tō suluë a' éna ye' suak. Ñies ie' iché tō ì wamblé a' tō sulu, e' tō a' eriawé taië tã i'ñe tã a' tso'ne ye' tsatkök. Ttè e' tō ye' kí ttsë'wë buaë.

8Yëkkuö patkë'miyö a' a, eré e' tō a' eriawé, erë kè ye' tkine tō iók ye' tō ipatkë'mi. Tsawe tã ye' ttsë'wëitö sulu, erë i'ñe tã kè ye' ttsërku'ia es. Mokí yëkkuö e' tō a' eriawé, erë e' dōr ekuölö è. 9I'ñe tã ye' ttsé'ne buaë. E' kè dōr tō ye' tō a' eria' e' kueki. E' dōr tō a' eriane es, e' tō a' er mane'wéne Skëkōl a. A' eriane wës Skëkōl kí ikiane es, e' kueki sa' kè wã a' suluone yës. 10Mik se' eriane wës ie' kí ikiane es, etã e' dōr se' er mane'woie ie' a as se' tsatkër. E' kueki kè se' kàne ttsë'nuk suluë se' eriar ese kí. Erë se' eriar èse, kè mène Skëkōl wã, ese tō duëwã tskeke. 11A' eriane wës Skëkōl kí ikiane es, e' saú, iiwà dettsã buaë! E' wã bikeitsó.

^c 6.16 Levítico 26.12; Jeremías 32.38 ^d 6.17-18 2 Samuel 7.14; Isaías 52.11; Ezequiel 20.34,41

E' batamik a' er téwā darërē tā a' ñi kékarak wēm tō ì sulu wamblé a' shuā, e' shulök. E' wa a' tō ikkaché tō a' kè ku' ì sulu e' a. Iwënewā tō a' e' tuléwāie darërē. Ì sulu e' tō a' uluwé a' suawéitō. Iwënewā tō a' éna ye' dalène taijē. Iwënewā tō a' tso'tke ì sulu shulök. E' qos wa iwënewā tō mokì a' kè ku'ñak ì sulu ñe' a. ¹²Ye' kè wā yëkkuō ñe' kitemi a' a wëm tō ì sulu wamblé' ñe' kkatoie. Ñies ye' kè wā ikitemi yi tā iwambléitō e' tsatkoie. E' skéie ye' tō ikitmi as a' wákpa éna iar buaë Skëköl wōa tō mokì a' tō sa' bikeitseke taijē. ¹³Ì wé a' tō, e' tō sa' er kí kuwéne buaë.

E' kíie tā a' tō Tito er kuwé taijē. Ie' ttsè'ne buaë e' tō sa' kí ttsè'wé buaë. ¹⁴A' kika'kayō ie' a tā a' kè wā ye' jaëone. Kekraë sa' ttō mokì a' tā, ñies ima sa' e' ttsékā a' wa Tito kukua, e' suéitō tō e' dör mokì. ¹⁵A' tō ie' kiéwā suane wa painè wa ena a' tso'tke ie' ttō dalöiök, mik e' ska' ie' er ane etā e' tō ie' ké a' kí dalëritsök taijē. ¹⁶Ye' erblömi a' mik e' tō ye' ttsè'weke buaë.

Se' er buaë chò siarëpa kimoie

8 ¹A yamipa, sa' éna a' a ipakak tō wës Skëköl er buaë ché Skëképa icha erule erule ñi dapa'uke Macedonia qos a, e'pa a. ²Ie'pa weine siarë íyi ulitane ulà a, erë e' shuā ie'pa ttsè'rke buaë. Ie'pa dör siarë, kè ì tā' taijē, erë ie'pa tō inuköl kakké er bua' wa. Wësua ie'pa dör inuköl blüpa. ³Ye' tō a' a ichè tō ie'pa imé qos ie'pa a imermi, e' tsatā iwákpa er wa. ⁴Ie'pa kköché taijē sa' a tō ñies kawō mú sa' a s'batse'r malepa serke Jerusalén, e'pa kimoie inuköl wa. ⁵Ie'pa tō imé taijē shute, sa' kè wā ibikeitse tō ie'pa a imermi ekké. Kewe ie'pa wákpa e' mé Skëképa a, e' ukuöki tā ie'pa e' ché sa' a wës Skëköl kī kiane es. ⁶E' kuëki sa' tō ikié Tito a tō ie' mi'ne a' ska' inuköl tsá kititō a' shu a e' bata shtöktsa s'siarëpa kimoie. ⁷Ì qos weke Skëköl a e' weke a' tō taijē. A' erblö buaë Jesús mik. A' tō ttè pakè buaë. A' wā íyi jcher taijē. Sulu a' éna s'malepa kimak. Sa' dalër taijē a' éna. E' sù sa' kī ikiane tō ñies a' er buaë chò taijē s'siarëpa a.

⁸Ye' kè ku' ichök a' a' patkoie. E' skéie ye' éna isuak tō mokì a' éna s'malepa dalër wës s'yamipa tso' Macedonia e'pa éna s'malepa dalër es. ⁹A' wā ijchertke buaë tō Skëképa Jesucristo er buaë ché a' a taijē. Ie' íyi tso' taijē ká jai a, e' me'atitō dë'bitu ká i' a siarëpaie a' dalërmik as a' blur ie' íyi taijē wa.

¹⁰A' tō ibikeits kewe sulitane yöki tō a' éna s'siarëpa kimak. Dwas suköt bak e' wa a' tō iwà kímémi kewe. E' kuëki ima ye' tō ibikeitse, e' chekeyö a' a. ¹¹Kanè buaë o'mi a' tō, e' eüwa er bua' wa wës tsawe a' tō ibikeits es. Inuköl shtó s'siarëpa kimoie qos a' a ikit ekké. ¹²Ì kè tā' se' wā, ese kè kiekü' Skëköl tō se' a. Erë ì tso' se' wā ese kakkésö er bua' wa qos se' a imer ekké, e' tā e' wër buaë ie' wa.

¹³Ye' kè ku' ichök tō a' íyi kakkú etā a' atne weinuk kè wā ì tā'. E' skéie buaë idir tō a' ñi kìmù ñikké. ¹⁴Ì'ne tā a' wā íyi tso' taijē, e' kuëki

buaë idir tö a' tö s'yamipa kè wà ì tã', esepa kìmù. Es aishkuö tã mik a' kè wà ì tã' tajë, erë ie'pa wà itso', etã ie'pa tö a' kìmèmi. Es a' ulitane ñi kìmùmi ñikkëë. ¹⁵E' dör wes itso' kitule Skëköl yëkkuö kï es, e' tö ichè: "Wé tö ishtë tajë, e' icha kè bata ate. Wé tö ishtë bërëbërë, e' icha deka wè!"^e

Tito ena iwapiepa

¹⁶Skëköl tö Tito erkiöwé a' kìmuk wes sa' éna a' kìmak es. E' kuekï ye' tö wéstela cheke Skëköl a. ¹⁷Mik sa' tö ikié Tito a tö ie' mi' a' ska' a' kìmuk inuköl shtëk, etã ie' éna a' kìmak tajë, e' kuekï ie' e' ché iwák er wa minuk a' ska'. ¹⁸Tito tã s'yami skà patkekemi sa' tö eköl. E' tö Jesús tté buaë pakeke buaë ká wa'ñie. E' kuekï ie' tté cheke buaë Skëképa Jesús icha erule erule tso' ká wa'ñie e'pa tö. ¹⁹E' kïie tã ie'pa kos tö ie' shushtë as imi' sa' tã Jerusalén, inuköl shteke sa' tö e' muk. E' kaneweke sa' tö buaë Skëképa kïkoka ena iwà kkachöie tö mokï sa' éna ie'pa kìmak. ²⁰⁻²¹Sa' e' chöke iwakanëuk buaë Skëképa wörki ñies sulitane wörki. E' kuekï wëm ñie' mi'ke sa' wá, e' wa kè yi a sa' kkatënuke inuköl shteke tajë sa' tö e' kï.

²²Ñies sa' tö s'yami skà patkeke ie'pa böl tã. E' er me'rie kaneblök buaë kekraë. Bànet sa' tö ie' su'bitu, e' kuekï ie' suule buaë sa' wá. Ñies ie' isué tö a' dör pë' buaë, e' kuekï ie' e' ché sa' kìmuk kanè i' wa. ²³Tito dör ye' wapie e' kaneblöke ye' tã a' kìmuk. S'yamipa böl ñie' mi'ke ie' tã, e'pa patké Skëképa Jesús icha eruleë tso' ká wa'ñie e'pa tö. Ie'pa wa Cristo kïkarkeka. ²⁴E' kuekï ikkachó ie'pa a tö ie'pa dalër a' éna as Skëképa icha eruleë tso' ká wa'ñie e'pa kos wá ijcher tö mokï a' tö s'dalëritseta'. Ikkachó ie'pa a tö wée' sa' e' tssöká tajë a' wa.

9 ^{1,2}Ye' wá ijcher tö s'batse'r malepa serke Jerusalén, e'pa kìmak a' éna er bua' wa. E' kuekï inuköl shteke sa' tö ie'pa a, e' kï ye' kè kawötã a' a yëkkuö skà shtëkne. Kekraë ye' e' tssökeka a' tté pakök Macedonia wakpa a. Ye' iché ie'pa a tö duas suköt bak e' wa a' dör Acaya wakpa, e'pa éna inuköl mak er bua' wa. E' tö ie'pa kibiie erkiöwé. ³Erë s'yamipa mañal ñie' patkekeyö a' ska' as ye' e' tssökeka a' wa e' kè dör é. E' skéie ye' kï ikiane tö a' wá inuköl tso'tke kitule wà mè è wes ye' tö a' pakè es. ⁴Dö' Macedonia wakpa döbitu ye' tã e'pa tö isuéwã tö kam a' tö inuköl e' shtë. E' tö sa' jaëweraë tajë sa' ikló'wé tö a' tö ishtëtke e' kuekï. ¿Wes e' kè tö a' jaëwepañak? ⁵E' è kuekï ye' ibikeitsé tö buaë idir s'yamipa mañal ñie' a ikiök tö ie'pa mi' ye' yöki kewe a' kìmuk inuköl muk a' kablé' e' shtëktsã. Es inuköl meke a' tö e' tso'tke kitule mik ye' de etã, iwà kkachöie tö a' imeke er bua' wa, kè dör kkë'blè wa.

⁶Ttè i' anú a' éna: "Yi tö ì kuatké elkela, ese ulá a iwà wördane elkela. Erë yi tö ì kuatké tajë, ese ulá a iwà wördane tajë." ⁷A' ulitane eköl eköl

^e 8.15 Éxodo 16.18

tö imú kōs a' ibikeitsé mè ekkè. Wépa tö imeke ttsë'ne bua' wa esepa dalër Skëköl éna, e' kuëkì kè imar er sulu wa ö diché wa. ⁸Kè a' tkinuk. Skëköl er bua' kí chòmi a' a tajë as ì kōs kiane a' kí sēnoie ese dō a' ulà a wè' kekraë. Nies ie' tö ikí mēmi a' a tajë shutë as a' ulà a idō tajë ì buaë kōs e' wōie. ⁹E' dör wēs itso' kitule Skëköl yëkkuö kì es. E' tö, yi tö ì meke er bua' wa, ese chē i' es:

“Ie' tö ikakme' tajë er bua' wa s'siarëpa a;

Ì buaë wētō e' ska' Skëköl er arke kekraë.”^f

Es Skëköl yëkkuö tö ichè. ¹⁰Skëköl tö iwō meke kuatkè ena chkè mekeitō se' a nē, nīes e' è tö ì kōs kiane se' kì s'kimoie, ese kí meraëitō a' a tajë as a' tö ì buaë ese kí ù tajë. ¹¹Kekraë ie' tö a' a íyi kí meraë buaë wè' as a' tö s'malepa kìmù buaë kekraë. Ie' tö iwerä es as wēstela yër tajë ie' a inuköl mēmi a' tö sa' ulà a e' kì. ¹²Es ì meke a' tö i' Skëköl dalōioie, e' wa s'batse'r malepa kìmè kiane, esepa ulà a ì kiane ie'pa kì ese dōraë. E' kīie tã ie'pa tö wēstela cheraë tajë ie' a ttsë'ne bua' wa. ¹³Ì buaë wēke a' tö ie'pa kimoie, e' wa iwërdawã tö mokì a' tso' Cristo tté buaë cheke a' tö tö mokì idir e' wã iutök. Nies iwërdawã tö a' tö ie'pa ena sulitane kimeke tajë er bua' wa. E' kōs kuëkì ie'pa tö Skëköl kikerakã tajë. ¹⁴E' kīie tã ie' er buaë ché a' a tajë shutë, e' kuëkì ie'pa tö ikieraë ie' a a' kì a' dalëritsè tajë e' wa. ¹⁵Wēstela chōsō Skëköl a ilà méitō se' a e' kì, e' dör buaë shutë kè se' a iyënukekè.

Pablo tö kanè me' Skëköl tö ie' a, e' tsãtké

10 ^{1,2}Ye' dör Pablo, e' wák kköchöke a' a bèrë er bua' wa wēs Cristo es tö ye' ttō ttsó. A' wēlepa tö sa' cheke tö sa' kanëblöke e' kè dör Skëköl a, e' dör sa' wákpa a wēs s'ditsö malepa es. Ie'pa icheke tö mik ye' tso' a' ska', etã ye' kēsik kè tã' a' uñoie. Erë mik ye' tso' yëkkuö shtök kã bānet, e' je' tã ye' kēsik deka. Erë e' kè yēne. Ye' kēsik tã' yi isie tso' ye' chök ese uñoie darërëë. E' kuëkì ye' kköchöke a' a tö a' e' shuló as kè ye' kawōtã a' uñuk darërëë mik ye' de a' ska' etã. ³Mokì sa' dör s'ditsö wēs sulitane es, erë kè sa' ñippökü' wēs s'ditsö ñippöke es. ⁴Ì tso' sa' wã e' alokã ì sulu kì, e' kè dör wēs ì tso' s'ditsö wã e' alokã ibolökpa kì es. E' skéie e' dör ì meke Skëköl tö sa' a diché tã' tajë e' alokã ì sulu diché kì ese. E' wa sa' tö kache tté ewëkewa. ⁵Nies tté kōs pakarke e' ttsëka wa s'wökl'wōie as kè s'wã Skëköl jcher, ese chōwëkewa sa' tö. Erbikè kōs kl'wëkewã sa' tö mekerö Cristo klò dikia as itō ittō iutō. ⁶Mik a' de sa' ttō iutök buaë, etã sa' tso'tke wépa kè éna iitutak, esepa kōs we'ikök.

⁷A' tö pè' suëke ikikke è, e' kè dör buaë. A' wēlepa e' bikeitsö tö e'pa è dör Cristo icha, e' tã as esepa tö ibikeitsöne. Nies sa' dör Cristo icha wēs ie'pa es. ⁸Skëköl tö ye' a ikéwö me' a' wöbla'wōie. Isalema e' wa ye' e' ttsökã tajë

^f9.9 Salmo 112.9

shüte. Erë e' kèwö mène ye' a a' er diché kí ioie, kè dör a' sulu'woie. E' kueki kè ye' jaëne e' ttsökka ikéwö mène ye' a e' wa. ⁹Kè a' tö ibikeitsar tö ye' éna a' tkiwak yëkkuö shtekeyö a' a e' wa. ¹⁰Welepa tö icheke: “Yëkkuö kos kitbitu Pablo tö se' a, e' ki ie' tö se' uñébitu darërë ttseskua ie' kësik deka buaë se' uñuk. Erë mik itso' se' ska' etä ikësik kè ta' yës. Wes ie' kapakò e' kè wa yi wa ie' dalöiëne.” ¹¹Wépa tö icheke es, esepa wa ijchenú tö mik sa' demi a' ska' etä ì kit sa' tö yëkkuö ki ká bánet, e' waweraë sa' tö.

¹²Ie'pa esepa ñi kikökeka taië. Kè sa' diché dè'ka e' chök tö sa' dör buaë wes ie'pa e' chò es. Ie'pa wákpa tö itské ier wa tö ì dör buaë wè. Wes ie'pa wakpa serke e' wéwa ie'pa ñi saù. iE' kueki ie'pa dör me'ukuöie! ¹³Kanè me' Skéköl tö sa' a, e' è wa sa' a e' ttsërmika. Kè sa' a e' ttsënuuka ì skà wa. Kanè mène sa' a ñies e' wà dör a'. ¹⁴E' kueki kè sa' ku' e' ttsökka taië shüte. Sa' kè dõpa kewe kanëblök a' shua, e'ma é sa' e' ttsökka. Erë sa' tö Cristo tté buaë e' paka' a' a tsawe. ¹⁵Ñies sa' kè e' ttsökka o'ka kanè wa, e' kèwö kè mène Skéköl wa sa' a e' kueki. E' skéie sa' ki ikiane tö sa' kanè a' shua e' mú kí ier buaë wes a' kí erblò mir Skékëpa mik es. Erë kè sa' kanëblõpa kos sa' a ikéwö mène e' tsata. ¹⁶Ñies Jesús tté buaë e' kí pakak sa' éna a' serke eë ká bánet tso' diwö mi'kewa e' kke eë. Erë kè sa' éna ipakak ká wé o'ka tso' ipakök eë as kè sa' e' ttsökka o'ka kanè wa.

¹⁷⁻¹⁸Wépa e' ttséka taië, esepa kè wër buaë Skéköl wa. Erë wépa kikéka ie' wák tö, esepa je' wër buaë ie' wa. Wëe' itso' kitule iyëkkuö ki i' es: “Yi e' ttsakka as ese e' ttsökka ì wé Skéköl tö ese wa.”^g

Pablo tö s'kitö'ukwakpa ché

11 ¹Ye' ttöke aliwakpaie erë a' mú tö ye' dal'ettsëia bërber è. A' we'ikèyö, ye' ttò kí ttsó ekuölö è. ²Ye' éna a' dalër taië. Ye' éna a' kkö'nak wes Skéköl tö se' kkö'neke es. Ye' ki ikiane tö a' e' tkõwa këkraë darërëe Jesús è a. E' dör wes ye' tö a' mé senukwa wëm eköl è ta es as a' dö wes busi batse'r dö imaso ulà a es. A' maso e' dör Cristo. ³I'ñe ta a' tso' tkëulewa buaë darërëe Cristo è a, erë ye' suane dö' a' e' müttsa e' kitö'uk wes Eva kitö'o'ka Satanás e' a' tkabëie e' tö kache wa es. Ye' suane dö' a' er tso' buaë etkëme Cristo è a, e' watè a' tö. ⁴Welepa de a' ska' Jesús tté pakök, erë kè idör imoki wes sa' tö ipakeke es. Erë e' ttseke a' tö buaë. Wiköl tté pakeke ie'pa tö, e' kè dör Wiköl Batse'r dè'wa a' er a e'. Ttè buaë pakeke ie'pa tö, e' kè dör imoki wes sa' tö ipaka' a' a es. Erë esepa kiekewa a' tö buaë. E' kueki ye' suane dö' a' erblò Cristo mik, e' olo'yène a' tö. ⁵Ie'pa de a' ska' sa' itöki e' chök tö ie'pa dör Jesús ttekölpa tsá bua'iewa, erë ye' kè e' ttsë'ne ie'pa dikia diöshet yës. ⁶Isalema ye' kè a ipakar buaë wes ie'pa icha pakò es. Erë tté pakeke ye' tö e' wà jcher buaë ye' wa. E' wà kkay'ëbitu sa' tö a' a taië íyi ulitane shua.

^g 10.17-18 Jeremías 9.24

⁷Mik ye' tō Skëköl ttë buaë e' paka' a' a, etā ye' kè wā a' ña'one e' kī yēs. E' kuëkī isalema a' tō ibikeitsé tō ttë pakeke ye' tō a' a, e' kè dör buaë. Erë es ye' e' wöëwa diöshet as a' dalöier. ¿Ima a' tō ibikeitsé? ¿Ì wéyö es e' dör suluë? ⁸Skëképa icha erule erule ñi dapa'uke ká bánet, e' dapömik ye' moneka kanebloie éme a' shua. E' dör wes ie'pa íyi ekibléyö a' kimoie es. ⁹Mik ye' sene' a' shua, etā ilè kiane ye' kī senoie, e' tā ye' kè wā a' tsirione ese wa. Erë s'yamipa datse Macedonia, e'pa wā ì kos kiane ye' kī e' de ye' a. Es ye' kè wā ì kine a' a, ñies kè yö ì kiepa. ¹⁰Ye' e' ttsò es e' kè yënuksa ye' ulā a' dör Acaya wakpa e' kos a. E' dör mokī wes Cristo tso' ye' a e' dör mokī es. ¹¹Ye' ttò es, ¿e' dör tō ye' kè éna a' dalër? Au, e' kè dör es. ¿Skëköl wák wā ijcher buaë tō ye' éna a' dalër? ¹²Ye' kaneblöraë a' shua wes ye' io'bitū es as ie'pa ñe' kè e' ttsòka tō ie'pa kanebloke wes sa' es. ¹³Ie'pa kè dör Jesús ttekölpa tsá mokī esepa. Ie'pa dör s'kitö'ukwakpa. Ie'pa e' ò tō ie'pa dör Cristo ttekölpa tsá mokī, erë e' kè dör es. ¹⁴E' kè dör ì kè suule se' wā ese. Satanás wák e' ò tō ie' dör Skëköl biyöchökwak olo ta' taië ese. ¹⁵E' kuëkī kè se' tkine tō ie' kanè mésopa e' ò tō ie'pa tso' sene yësyësë e' tsatkök. Bata ekké tā ie'pa ulā a' iské doraë wes ie' wamblörak es.

Pablo weine ie' dör Cristo tteköl e' kuëkī

¹⁶Ye' tō iskà chène a' a, kè a' tō ye' bikeitsök tō ye' dör aliie. Erë a' welepa tō ye' bikeitsé es, etā kawö mú ña bërber è e' ttsokā wes aliwak es. ¹⁷Ye' e' ttsökeka, e' ttè kè mène Skëképa Jesús wā ye' a. Ye' wák tō icheke aliie. ¹⁸Taië its'o'rak e' ttsökka iwákpa íyi wa, es ñies ye' e' ttsökeka wes ie'pa es. ¹⁹iAj! A' dör íyi jcher taië ese wakpa. Erë s'kukuò darërë esepa dalë'ttseke a' dör er bua' wa. ²⁰Wépa de a' ska' a' klö'ukwā wes ie'pa icha es, esepa kiekewā buaë a' tō. Ie'pa de a' kitö'uk a' íyi yottsā a' ulā a. Ie'pa e' ttsöke taië a' kī, a' ppeke a' wö kī, a' cheke erë ie'pa kiéwā a' tō er bua' wa. ²¹iAj! iYe' wák e' jaëüne mik ye' ichè tō sa' diché kè dë'ka a' sauk es etā!

Ie'pa diché deka e' ttsokā taië, e' tā ñies ye' diché deka e' ttsokā. Ye' wák a' tā ye' ttò es, e' dör wes aliwakpa ttò es. ²²Ie'pa dör hebreowak, e' wa ie'pa e' ttsökeka taië. Erë ñies ye' dör ie'pa ditséwö. Ie'pa e' chò tō ie'pa dör Israel aleripa, erë ñies ye' dör Israel aleri. Ie'pa e' ttsökeka taië tō ie'pa dör Abraham aleripa. Ñies ye' dör Abraham aleri. ²³Ie'pa e' chò tō ie'pa dör Cristo kanè mésopa. Es ye' dör ñies, erë ye' dör ikanè méso bua'ie ie'pa tsata. Ye' ttò es e' dör wes aliwak ttò es, erë Cristo a' kaneblo e' wa ye' e' aléka taië ie'pa kī. Ye' wötëule s'woto wé a' taië ie'pa tsata. Ye' buule tsa'bata daloie ese wa taië shute ie'pa tsata. Taië ye' bakshkar ye' duöwā e' ulā a. ²⁴Sketökicha judiowak tō ye' buk tsa'bata wa. Bitökicha ie'pa tō ye' ppé, etā ie'pa tō ye' ppé dò dabom tkëyök tsá yënetsa et ekké^h ²⁵Mañatökicha romawak tō ye' buk kal wa. Etökicha ye'

^h 11.24 dabom tkëyök tsá yënetsa et: E' kéwö ska' tā judiowak ttè dalöieno tō ichè tō kè kawö ta' s'ppök dóka dabom tkëyök tsata. Ie'pa wöblane pé' sulusipa ppök dóka dabom mañayök kí sulitu as kè itkòka dabom tkëyök tsata.

tè'rakitò ák wa ye' ttowá. Mañatòkicha kanò kǐ ye' mirwá, e' wötunewá dayè á. E' shuá etòkicha ye' bak àr kaltakla kǐ dayè kǐ ká et ñiè nañeè. ²⁶Ye' shké taijè, e' shuá di' taijè ena akblòkwakpa tò ye' tkiwé siarè. Ye' wák ditséwòpa ena o'kapa, e'pa tò ye' we'ikeke, e' dalò taijè e' shuá ye' shké. Wé pè' serke taijè ena wé pè' kè serku' taijè, ñies dayè kǐ, ese ska' ye' shké wòsh wa. Ñies wépa e' ò tò ie'pa dör Jesús mik erblòkwakpa, esepa dalò mène taijè ye' kǐ. ²⁷Ye' kaneblé taijè darèrèè. Ye' wòñine taijè, ye' bli dalè'ttsè' taijè, ye' ersi dalè'ttsè' taijè. Mikle tǎ ye' kè wá ì kune ñanoie, tteke kase tò taijè, kè datsi' tǎ' wè' e' patroie.

²⁸E' kǐ skà tso', e' dör tò Skèkèpa Jesús icha erule erule, e'pa kos bikeitsekeyò kèkraè tò is ie'pa mir. ²⁹Mik ie'pa welepa diché kè dè'kaia buaè e' tkowá darèrè Jesús mik, etǎ ye' mik e' dalène. Mik yile tò ie'pa ké ì sulu wamblòk, etǎ e' tò ye' uluwé suluè. ³⁰Ye' mú e' ttsakka, e'ma ì tò ikkacheke tò ye' kè diché tǎ' ese wa ye' e' ttsòmika. ³¹Skèkòl dör Skèkèpa Jesús Yé ena iKèkòl kǐkarka kèkraè, e' wá ijcher tò ye' kè ku' kachòk. ³²⁻³³Mik ye' bak Damasco, etǎ ká e' wòkir kaneblòke iblú kiè Aretas e' á, e' tò ishkèkipa patké ye' klò'ukwá ká e' kköièule shkit kakkèè, e' wékkò á. Erè s'yamipa welepa tò ye' iéka kkó á tǎ tsa' wa ye' émi enaena iwékkò tsitsir tso' ese á döttsa iski. Es ye' tkashkar ie' yòki.

Ì kkaché Skèkèpa tò Pablo á kabsueie

12 ¹Kè dör ìie bua', erè ye' kawòtǎ kǐ e' ttsòkkaia e' tsatkoie. Ì kkaché Skèkèpa Jesús tò ye' á kabsueie e' pakekeyò a' á i' tǎ. ²Wém suule ye' wa ekòl dör Cristo ttòkata, e' minetsér ká jai á, e' kǐ duas de dabom eyòk kǐ tkèl (14). Ye' kè wá ijcher tò ie' mine'ka chkaè ò wikòlie, e' jcher Skèkòl è wá. ^{3,4}Wém e' suule ye' wá, e' minetsér ká jai á e' dör ká buaala ee. Ee ttè kè yènuke se' á ena kè se' á ikéwò mène chè, ese ttséitò. Iskà chekeneyò a' á tò ye' kè wá ijcher tò imine'ka chkaè ò wikòlie, e' jcher Skèkòl è wá. ⁵Wém ese kǐkèmikǎ ye' tò, erè ye' wák kè e' kǐkòpaka. Erè ye' diché kè tǎ' e' è wa ye' e' kǐkòmika. ⁶Ye' mú e' ttsakka, e'ma ye' á e' ttsèrmika ttè mokǐ wa, e' kuèkǐ e' kè dör suluè. Erè kè ye' e' ttsòtǎ'ka as kè yi ibikeitsò tò wes ye' wèr ena wes ye' ttò e' tsatǎ ye' dör. ⁷Íyi taijè buaè kkayène ye' á ká jai á, ñè kuèkǐ ilè mène ye' á ye' wòowaie as kè ye' e' ttsòka ì buaè su'yò e' wa. E' dör wes dika' tkèrwá ye' chkà á es, e' wa ye' rrewèke Satanás tò kèkraè. ⁸Mañatòkicha ye' kköyè' Skèkèpa á tò iyótsa ye' á. ⁹Erè ie' ye' iuté: “Mik be' diché kè tǎ', etǎ e' kǐ Ye' diché wènewá bua'iewá. E' kuèkǐ ye' er buaè chò be' á, e' è dör wè' be' á.” E' kuèkǐ buaè idir ye' á e' ttsòkka ye' diché kè tǎ' e' wa as Cristo diché taijè e' wèrwá bua'iewá ye' kǐ. ¹⁰Mik ye' ttsé'r tò ye' diché kè tǎ', e' je' tǎ ye' diché tǎ' taijè. E' kuèkǐ mik ye' diché kè tǎ', mik ye' yérke suluè, mik ye' kè wá ì tǎ', mik ye' we'ikeke siarè pè' tò, mik ye' kawò tkòke suluè, mik ese kos tkòke ye' tǎ Cristo dalèrmik, etǎ ye' ttsè'ne buaè.

¹¹Eré ye' kè dör yi, erè wépa cheke a' tò tò e'pa dör Jesús ttekòlpa tsá bua'iewá, e'pa kè dör ye' tsatǎ. A' tò ye' tsatkòpa ie'pa yòki erè e' kè one

a' wā. E' kuekī a' tō ye' ké e' ttsökka taië wēs aliwak es. ¹²Mik ye' bak senuk a' shuā, etā ye' weine kos e' dalē'ttséyö bërë er bua' wa. Nies ì kè or yi a ese wéyö taië a' wörki Skököl diché taië wa s'tkiwë ekkë. E' wa iwënewā tō mokī ye' dör Jesús ttekölpa tsá, e'pa eköl. ¹³Ye' kè wā a' kàne ye' kanéuk. E' è wa a' wöanewa Skökëpa icha erule erule malepa e' dikia diöshet. A' we'ikèyö, e' nuí olo'yó ye' ki.

Pablo kablé ie'pa pakök

¹⁴Ye' tso'tke shkök a' pakök. I' tã ide mañatökicha. I' ètökicha wēs kekraë kè ye' e' maupaka a' mik as a' tō ye' kkö'nü. Ye' kè tkirku' a' iyi ki, ye' tkirke a' wákpa ki. A' dör wēs ye' ala'r es. Ila'r kè kawötā iyé kkö'nuk, e' skéie iyé kawötā ila'r kkö'nuk. ¹⁵E' kuekī ye' e' chétke ì kos tso' ye' wā e' eukwa er bua' wa a' kimoie dö ye' wákë. Ye' tō a' dalëritseke kīta kīta, etā a' éna ye' dalër ze' mir wa'k è?

¹⁶A' ye' sini'kué buaë tō mik ye' bak a' ska', etā ye' kè e' moneka a' mik. Erë a' welepa tō icheke tō ye' tō a' kītö'wé a' inuköl klö'woie akir. ¹⁷¿Ima a' erbikö tō wépa patkè'yö a' ska', e'pa wa ye' tō a' kītö'wé? ¹⁸Ye' kköyè' taië Tito a' tō ie' mi' a' ska', etā s'yami skà eköl patkè'miyö ie' tã. ¿Tito tō a' kītö'? Au, ie' sene buaë yësyësë a' shuā wēs ye' es. Sa' böl sené a' shuā ñi suë.

¹⁹Isalema a' tso'ia ibikeitsök tō sa' e' tsatköke a' yöki. E' kè dör es. Ñermata sa' tso' ttök Skököl wörki wēs s'batsulewā Cristo mik esepa ttö es. A yamipa dalër ye' éna, ì kos weke sa' tō e' dör a' er diché kī ioie.

²⁰Mokī ye' suane dö' mik ye' de a' ska', etā ye' kè tō a' suë wēs ye' ki a' kiane suë es. Nies ye' suane dö' a' kè tō ye' suë wēs a' ki ye' kiane suë es. Ye' suane dö' ye' ikué tō a' ñippöke, a' ukyërke ñi ki, a' ulurke ñi ki, a' er me'rie a' wákpa è ki, a' biyöblöke ñi ki, a' ñi chöke suluë, a' e' ttsökeka taië, a' ñi chiliuke. ²¹Nies ye' suane dö' mik ye' dene a' ska' etā Skököl tō ye' jaëwë a' kuekī. Dö' a' taië kè er maneone. Dö' a' e' ia'ukekaia sene sulusi wa. Dö' a' tso'ia trënuke ena a' tso'ia ì sulu skà kukuëña a' wā e' a. E' dör es, e' tã Skököl tō ye' iuwëraë siarë a' wa.

13 ¹I' tã mañatökicha ye' mi'ke a' pakök. Ì tso' a' wā shulë, e' shuleraësö wēs itso' kitule Skököl yëkkuö ki es, e' tō ichë: “Ttë kos shulekesö etā ittekölpa kiane böl ö mañal ichoie tō mokī idir ö au.” ²Mik ye' bata dë'rö a' ska', etā wépa tō ì sulu wamblé, e'pa a ye' iyè' tō a' kawötā ilo'yök. I'ñe tã ye' kè ku' a' ska', erë ye' tō iskà chekene ekkëpa a' ena a' malepa tso' ì sulu wamblök, esepa a' tō mik ye' dene, etā a' shuleraëyö darërëë. ³A' ichë tō a' ki ikiane suë tō mokī ye' ttöke Cristo diché wa. Mik ye' de a' ska', etā a' isueraë tō es idir. Cristo diché tã' taië, e' tso' iwakanéuk a' shuā, ie' kè dör wēs se' kè diché tã' es. ⁴Mokī ie' kötëwā wötëulewā krus mik wēs se' kè diché tã' es, erë ie' serkene Skököl diché taië e' wa. Es ñies sa' batsulewā ie' mik, e' kuekī wësua sa' kè diché tã', erë Skököl diché wa sa' serdaë a' kimoie.

⁵A' wakpa e' saú tò moki a' erblöke Jesucristo mik. A' ibikeitsó buaë. ¿A' kè wà ijchër tò ie' tso' a' er a? E' kè dör es, e' tã e' wà kiane chè tò a' kè dör ie' icha. ⁶A' mú wöä iwëne tò sa' kaneblè' a' shua e' wà dettsa buaë. ⁷Sa' tso' ikiök Skëköl a' tò a' kè tò ì sulu wamblökiã. Sa' kè ku' e' kiök as iwër tò ye' kaneblè' a' shua e' wà dettsa buaë. E' skéie sa' kï ikiane tò a' ser buaë yësyësë wës Skëköl kï ikiane es, eré welepa wa iwër tò sa' kaneblè' e' kè wà dë'ttsa buaë. ⁸Mik a' serke buaë wës Skëköl ttè moki tò ichè es, etã e' kï kè sa' a' ì yënuK. E' skéie e' kikekeka taië sa' tò. ⁹Sa' kè diché tã, erë mik a' e' tkëulewã darërë Skëképa ttè a, etã e' tò sa' ttsë'weke buaë. Sa' tò ikiè michoë Skëköl a' tò a' mú dò senuk buaë yësyësë kekraë wës ie' kï ikiane es. ¹⁰Mik ye' de a' ska', etã kawö mène ye' a' a' kï, e' kè wà shulak ye' éna darërë kësik wa. Skëképa Jesús tò e' kèwö me' ye' a, se' er diché ioie, e' kè dör se' sulu'woie. E' kuëkï ye' tso' yëkkuó i' shtök a' a' kam ye' dò a' ska' e' yöki as ì kos tso' shulè, e' shulò a' tò kam ye' dò e' yöki.

Pablo e' chéat

¹¹A yamipa, bataie yö ichè tò a' ttsé'nú buaë. A' e' chó senuk yësyësë. A' er kuú. A' kabikeitsó ñikkëë. A' senú bèrë ñita. A' serke es, e' tã Skëköl dör dalëritsókwaK ena sene bèrë mukwaK, e' serdaë a' tã kekraë.

¹²A' ñi shke'ú ñi dalëritsè wa. S'batse'rpa kos tò a' shke'wëmi.

¹³As Skëképa Jesucristo er buaë chó a' a. As Skëköl tò a' a' ikkachò tò a' dalër taië ie' éna. Nies as Wiköl Batse'r tò a' kò senuk wës wák eköl è es.